

CONVENIO DE COLABORACIÓN ENTRE O PARLAMENTO DE GALICIA E A CONSELLERÍA DO MEDIO RURAL PARA A ORGANIZACIÓN DA PROVISIÓN E REPARTICIÓ DE ALIMENTOS PARA AS PERSOAS EN SITUACIÓN DE VULNERABILIDADE AGRAVADA A RAÍZ DA COVID-19

En Santiago de Compostela, o 27 de novembro de 2020

REUNIDOS

Dunha parte, don Miguel Ángel Santalices Vieira, na súa condición de presidente do Parlamento de Galicia, actuando ao abeiro das facultades que lle confire o artigo 31.1 do Regulamento do Parlamento de Galicia do 1 de setembro de 1983 (DOG núm. 4, do 7 de xaneiro de 1984) modificado o 6 de agosto de 2015 (DOG núm. 162, do 26 de agosto de 2015).

Doutra parte, don José González Vázquez, conselleiro do Medio Rural, actuando en nome e representación da Xunta de Galicia, en virtude do disposto no artigo 34 da Lei 1/1983, do 22 de febreiro, reguladora da Xunta e da súa presidencia, e segundo o Decreto 112/2020, do 6 de setembro, polo que se nomean os titulares das vicepresidencias e consellerías da Xunta de Galicia.

Ambas as partes recoñecen a súa competencia e capacidade legal necesaria para o outorgamento deste convenio e para estes efectos

EXPOÑEN

1. O 11 de marzo de 2020, a Organización Mundial da Saúde elevou a nivel de pandemia internacional a situación de emerxencia de saúde pública xerada pola expansión do coronavirus SARS-CoV-2 (covid-19). Esta expansión está a xerar unha crise sen precedentes recentes na saúde pública que afecta todos os sectores e individuos, ademais de no eido sanitario, no ámbito económico e social. As distintas administracións, organismos e institucións, nacionais e internacionais, tiveron que adoptar medidas drásticas e urxentes para a prevención e loita contra esta pandemia.



II. Aínda que os sistemas asistenciais autonómicos e locais e as medidas complementarias adoptadas polas distintas administracións tras a declaración da pandemia tentan dar resposta á maior parte das necesidades das persoas máis golpeadas polos seus efectos, todos os esforzos non abundan para satisfacer os picos de demanda de recursos de subsistencia, especialmente daquelas persoas ás que xa a pasada crise económica deixara en situación de vulnerabilidade e aquelas outras sometidas a factores de exclusión engadidos.

III. O 20 de outubro de 2020, con motivo do Día Internacional para a Erradicación da Pobreza, o Parlamento de Galicia reiterou o seu compromiso coa necesidade de seguir avanzando na loita contra a pobreza e a exclusión social. Os deputados e deputadas da Cámara son conscientes de que os impactos socioeconómicos da crise sanitaria da covid-19 están a intensificar a vulnerabilidade daquelas persoas que xa se atopaban nesta situación con anterioridade á pandemia, persoas e familias cos ingresos máis baixos, con traballos precarios e baixa intensidade laboral e con outros factores de risco, mais tamén que as circunstancias sobrevidas están a levar a unha situación de grave risco de pobreza a persoas que non o experimentaran ata o momento.

IV. Nestes meses, as entidades de iniciativa social están a constatar o agravamento da situación das persoas máis necesitadas. Desde o comezo da pandemia estas entidades e, nomeadamente, os comedores sociais, cociñas económicas e bancos de alimentos fixeron e continúan a desenvolver un sobreesforzo adaptando os protocolos dos servizos asistenciais que prestan co fin de evitar aglomeracións que poidan supor un risco sanitario. Isto supón moitas máis horas de traballo para as entidades que a maiores se multiplican para dar resposta á acrecentada demanda que en moitas cidades e vilas se duplicou na primeira onda da pandemia e que desde setembro mostra unha tendencia crecente da que non prevén melloría a curto prazo.

As entidades de iniciativa social que prestan o servizo de cobertura alimentaria abastécense periodicamente das achegas recibidas de organismos públicos, de empresas e tamén de particulares, que en maior grao participan a través de campañas de gran recollida no verán e en decembro. Moitos bancos de alimentos acusan a perda que para as reservas das entidades provocou a suspensión pola covid-19 da campaña do verán.





V.As medidas adoptadas a raíz da declaración da situación de emerxencia sanitaria no territorio da Comunidade Autónoma de Galicia aprobada o pasado 13 de marzo na reunión do Consello da Xunta de Galicia, a posterior declaración do Goberno central de estado de alarma para a xestión da situación de crise sanitaria ocasionada polo covid-19 do 14 de marzo e as súas sucesivas prórrogas, a Orde da Consellería do Medio Rural do 23 de marzo de 2020, tiveron consecuencias inmediatas de paralización xeneralizada das actividades económicas non esenciais, coa consecuente súbita interrupción das vías habituais de chegada ás persoas consumidoras de produtos agrogandeiros, produto fresco e da horta, que, polo tanto, implicou tamén a inmediata perda de ingresos de persoas agricultoras e gandeiras, recursos económicos imprescindibles para o sostemento de familias e explotacións no sector primario, sector que en Galicia ten unha relevancia e peso fundamental, ademais de ser o motor principal de dinamización do sector rural.



VI. Ante esta situación, por Orde do 13 de abril de 2020 a Consellería do Medio Rural puxo en funcionamento unha canle para a comercialización de produtos agrogandeiros de proximidade no territorio da Comunidade Autónoma de Galicia co nome de *Mercaproximidade* para a venda desas producións de calidade e facilmente identificables, para que as persoas consumidoras que naquel momento non podían acudir para o seu abastecemento ordinario aos mercados locais tradicionais nin consumilos directamente en establecementos de hostalaría e restauración, puidesen atopalos e identificalos con claridade nos establecementos de venda de alimentos que permanecían abertos.

VII. Ao abeiro do disposto no artigo 4.4 da Orde do 13 de abril e de conformidade co establecido na disposición adicional terceira da Lei 9/2007, do 13 de xuño, de subvencións de Galicia, a Consellería do Medio Rural veu adquirindo directamente producións de agricultores/as e gandeiros/as ou industrias de transformación de produtos agrogandeiros integrados na rede Mercaproximidade e cedeunos a comedores sociais, bancos de alimentos e centros sanitarios.

VIII. A finais de outubro, ante a tendencia ascendente da transmisión do virus e o rexistro de niveis moi preocupantes dos principais indicadores epidemiolóxicos e asistenciais, o Goberno da Nación declarou o estado de alarma para conter a propagación de infeccións causadas polo SARS-CoV-2, e estableceu medidas restritivas aplicables sobre a libre circulación, mobilidade xeográfica e reunión das persoas

(BOE número 282: Real decreto 926/2020, do 25 de outubro). Ante a grave e excepcional situación sanitaria, é incuestionable que os efectos socioeconómicos provocados pola pandemia se prolongarán no tempo, agravando a situación das persoas en risco de exclusión e aumentando o número de familias máis desfavorecidas.

IX. O Parlamento non quere permanecer alleo ao traballo de apoio e compromiso coas entidades sociais que desde todas as administracións e nomeadamente desde a Xunta de Galicia se están a desenvolver. A cooperación que se procura neste acordo entre o Parlamento de Galicia e a Consellería de Medio Rural redundará no beneficio dos colectivos máis vulnerables, ao tempo que contribuirá á viabilidade dos sectores agrícola e gandeiro de Galicia.

En virtude do exposto, as partes intervenientes, desde o seu respectivo ámbito natural de competencias e segundo están representadas, establecen o presente convenio de colaboración que se rexerá polas seguintes

CLÁUSULAS

Primeira. Obxecto e finalidade da colaboración

O obxecto da colaboración entre o Parlamento de Galicia e a Consellería do Medio Rural é a organización dun sistema que permita a provisión e distribución a través de entidades de iniciativa social de alimentos destinados ás persoas en situación de vulnerabilidade agravada a raíz da covid-19.

Esta colaboración ten como finalidade continuar a cooperación coas entidades de iniciativa social que realizan actuacións dos servizos de cobertura de necesidades de alimento dotándoas de produtos agrogandeiros adquiridos directamente a agricultores, gandeiros e/ou industrias de transformación de Galicia.

Segunda. Suxeitos da provisión

As estipulacións deste convenio vinculan o Parlamento de Galicia e a Consellería do Medio Rural de cara á concesión de subvencións en especie a entidades de carácter social non lucrativas, concretamente comedores sociais e bancos de alimentos.

As ditas subvencións rexeranse polo estipulado na disposición adicional 3ª da Lei 9/2007, do 13 de xuño, de subvencións de Galicia, e no artigo 3 do Decreto 11/2009, do 8 de xaneiro, polo que se aproba o regulamento da lei.


Para tales efectos, as entidades sociais beneficiarias terán que cumprir os seguintes requisitos:

- a) Estar inscritas no Rexistro Único de Entidades Prestadoras de Servizos Sociais, regulado polo Decreto 254/2011, do 23 de decembro, polo que se regula o réxime de rexistro, autorización, acreditación e a inspección dos servizos sociais en Galicia. Así mesmo, acreditarán aqueles datos que puidesen non estar actualizados no mencionado rexistro (estatutos, CIF, apoderamento do representante e NIF) ou que sexan precisos para a súa participación.
- b) Carecer de ánimo de lucro.
- c) Ter o seu domicilio social en Galicia ou delegación na Comunidade Autónoma.
- d) Non encontrarse en ningunha das situacións de prohibición establecidas no artigo 10 da Lei 9/2007, do 13 de xuño. A acreditación de non estar incursas nas ditas circunstancias realizarase mediante declaración responsable da persoa representante da entidade.

Terceira. Compromisos das partes

A Consellería do Medio Rural asume o compromiso de realizar as seguintes actuacións:

1. Difundir entre as entidades de iniciativa social prestadoras do servizo de cobertura alimentaria, de conformidade co establecido no artigo 4.4 da Orde do 13 de abril, a información relativa ás axudas que constitúen a finalidade deste convenio, solicitando a súa participación.
2. Recadar de cada unha das entidades beneficiarias as necesidades de produtos agrogandeiros que, conforme as súas estimacións, precisan para desenvolver o seu labor asistencial.



3. Requerir de entre os operadores integrados en Mercaproximidade, que cumpran os requisitos de aptitude para contratar co sector público establecidos na Lei 9/2017, do 8 de novembro, de contratos do sector público, orzamentos para os distintos produtos demandados polas entidades beneficiarias. Os orzamentos deberán incluír a entrega do produto na sede ou almacén que designe cada entidade beneficiaria e que constará no orzamento. A selección dos operadores farase en atención a criterios de proximidade xeográfica ás entidades beneficiarias. O importe de compra para cada provedor deberá ser inferior a quince mil euros (15.000,00€), IVE excluído.

4. Coordinar a demanda das entidades sociais e a oferta dos provedores, tras do cal remitirá ao Parlamento de Galicia, antes do 30 de novembro, o informe-proposta da Dirección Xeral de Gandaría, Agricultura e Industrias Agroalimentarias co seguinte detalle:

- Entidade social beneficiaria (nome e CIF)
- Produto e contía que se subministrará.
- Provedor (nome social e CIF/NIF)
- Importe total, incluídos os gastos de transporte e entrega.

5. Unha vez recibida a resolución da aprobación das propostas de concesión por parte do Parlamento, dar a orde de subministración a cada provedor.

Pola súa parte, o Parlamento de Galicia asume o compromiso de:

- Recadar das entidades beneficiarias a documentación segundo a cal acrediten cumprir os requisitos detallados na cláusula segunda.
- Cofinanciar este programa nos termos da cláusula cuarta e xestionalo economicamente co cofinanciamento da Consellería do Medio Rural.
- A Presidencia do Parlamento resolverá sobre as propostas de concesión de subministracións facilitadas pola Consellería do Medio Rural, sempre que o proveedor proposto cumpra os requisitos de aptitude para contratar co sector público establecido na Lei 9/2017, do 8 de novembro, de contratos do sector público.



4. Notificar os termos da concesión ás entidades de carácter social, para o seu coñecemento e publicidade por parte destas nos seus medios de difusión (paxina web, redes sociais, taboleiros, etc.), a obriga legal de destinar as subministracións concedidas á finalidade deste convenio, así como outras obrigas legais que procedan.
5. Recadar das entidades beneficiarias o certificado de recepción das subministracións concedidas.
6. O pagamento aos provedores polas subministracións entregadas. Este efectuarase unha vez presentada a factura por parte do proveedor no Punto Xeral de Entrada de Facturas da Comunidade Autónoma de Galicia, dirixida ao Parlamento de Galicia, xunto co certificado da conta bancaria da súa titularidade en que facelo efectivo.
7. Dará conta á Consellería de Medio Rural da execución do programa en canto remate o pagamento comprometido.

Cuarta. Réxime económico



O compromiso económico do Parlamento de Galicia derivado do presente convenio é de sesenta e cinco mil euros (65.000,00€), con cargo á partida orzamentaria 01.01.111B.481.02, denominada 'Subvencións a entidades de carácter social', do estado de gastos do exercicio 2020.

As obrigas de organización e didáctica asumidas polo Parlamento de Galicia neste convenio serán imputables aos gastos xerais previstos nos seus orzamentos.

O compromiso económico da Consellería do Medio Rural é de sesenta e cinco mil euros (65.000,00€), con cargo á aplicación orzamentaria 14.04.713D.221.99 (código de proxecto 2015 00612).

Para estes efectos, o presente acordo será remitido á Dirección Xeral de Planificación e Orzamentos, xunto coa documentación pertinente, para que se leve a cabo a modificación de crédito na aplicación orzamentaria do Parlamento de Galicia que figura nos Orzamentos Xerais da Comunidade Autónoma, coa baixa correspondente na aplicación da Consellería do Medio Rural.

Esta dotación será librada en firme ao Parlamento conforme o disposto no apartado dous da disposición adicional sétima da Lei 11/1996, do 30 de decembro, de orzamentos xerais da Comunidade Autónoma de Galicia para 1997.

Quinta. Comisión paritaria de seguimento



Como mecanismo de coordinación para o adecuado desenvolvemento das actuacións previstas constituirase, reuníndose sempre que sexa necesario, unha comisión paritaria integrada por unha persoa en representación do Parlamento de Galicia e unha persoa en representación da Xunta de Galicia nomeada pola Consellería do Medio Rural. Poderán asistir outros membros, sen voz e sen voto, a petición de cada unha das partes.

A comisión considerárase o mecanismo de seguimento, vixilancia e control da execución do convenio, para os efectos da Lei 40/2015, do 1 de outubro, de réxime xurídico do sector público, e da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Sexta. Prazo de vixencia, modificacións e causas de resolución

Este convenio de colaboración estará vixente dende a súa sinatura ata o 31 de decembro de 2020, sen prexuízo das responsabilidades adquiridas durante o tempo de vixencia do convenio.

As partes poderán modificar os termos deste convenio de acordo mutuo. Mediante addenda achegárase as modificacións sobre o seu contido acordado polas partes.

Son causa de resolución deste convenio as seguintes:

- 
- a) Mutuo acordo das partes manifestado por escrito.
 - b) Denuncia feita por calquera das partes, formulada por causas xustificables.
 - c) Incumprimento das obrigas e compromisos asumidos por calquera das partes dos acordos do convenio.

A parte incumpridora non terá que indemnizar economicamente a outra parte por incumprimento das obrigas do convenio ou a súa extinción, sen prexuízo da súa responsabilidade fronte a terceiros.

As controversias a que poidan dar lugar a aplicación e interpretación deste convenio serán resoltas pola comisión de seguimento prevista na cláusula quinta. En defecto de tal resolución, a orde xurisdiccional contencioso-administrativa será a competente para coñecer das controversias que se susciten na execución do convenio.

Sétima. Difusión da colaboración das partes

O asinamento deste convenio supón o consentimento expreso de ambas as partes para faceren públicos, a través dos distintos soportes de comunicación e difusión que procedan, os datos referidos ao seu contido, de conformidade coa normativa sobre transparencia e boas prácticas que sexa de aplicación a cada unha delas.

Oitava. Natureza xurídica

Este convenio de colaboración ten natureza administrativa, rexéndose os seus efectos polo establecido nas súas cláusulas e aplicando a Lei 40/2015, do 1 de outubro, de réxime xurídico do sector público. Queda excluído do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, e rexeráse polas súas propias cláusulas e, de forma supletoria, polas normas xerais do dereito administrativo. Porén, será aplicable no relativo á aptitude para contratar co sector público do proveedor seleccionado.

Novena. Protección de datos de carácter persoal

En aplicación deste convenio, respectaranse cantas exixencias establece o Regulamento UE 679/2016, xeral de protección de datos, e a Lei orgánica 3/2018, do 5 de decembro, de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte a alteracións, perdas, tratamentos ou accesos non autorizados, resultando aplicables todos os dereitos e obrigas derivados desta normativa.



Décima. Transparencia e bo goberno

O convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e o Decreto 126/2006, do 20 de xullo, polo que se regula o Rexistro de Convenios da Xunta de Galicia.

As partes asinantes consenten na publicación dos seus datos persoais no Portal de Transparencia e Bo Goberno da Xunta de Galicia, así como no Portal de Transparencia do Parlamento de Galicia.

En proba de conformidade, as partes implicadas subscriben este convenio de colaboración por triplicado e para un só efecto no lugar e data indicados no encabezamento.



PARLAMENTO
DE GALICIA
PRESIDENCIA

Miguel Ángel Santalices Vieira,
Presidente do Parlamento de
Galicia



DE GALICIA
CONSELLERÍA DO MEDIO RURAL
CONSELLEIRO

José González Vázquez
Conselleiro do Medio Rural